



焦太史編輯國朝獻徵錄卷之七目錄

侯一 世封侯

武定侯郭英

郭良

泰寧侯陳珪

武安侯鄭亨

鎮遠侯顧成

顧興祖

顧溥

顧仕隆

顧寰

顧承光

永康侯徐忠

隆平侯張信

豐城侯李彬

李熙

寧陽侯陳懋

西寧侯宋晟

宋誠

安遠侯柳溥

陽武侯薛祿

恭順侯吳瑾

定西侯蔣貴

撫寧侯朱謙

朱永

懷寧侯孫鏗

同校

刊行

目錄

焦太史編輯國朝獻徵錄卷之七

侯一 世封侯

武定侯郭公英神道碑銘

楊榮

洪惟 太祖高皇帝龍飛淮甸應天順人芟刈羣雄

戡定海內一時智勇材力之臣感會風雲效其忠勤

輔成 帝業開千萬載太平之運奇勲偉績鏗鉤振

耀勒銘鼎彝垂光竹帛與 國家相為無窮倚歟盛

哉予嘗叨職國史竊觀開國勲臣其間能身躋壽考

世為貴戚子孫享有顯爵久而益盛者不數人豈非

其存心之仁與積累之厚有間耶若營國威襄公蓋

足徵焉公姓郭氏諱英臨淮人生有異徵沉毅多智
身長七尺膂力過人尤精騎射年十八從太祖起
義兵甚見親信每令直宿帳中取徐泗滁和采石太
平建康鎮常寧國諸郡屢立戰功上嘗以郭四呼
之 上親征僞漢陳友諒大戰鄱陽湖相持連晝夜
公時金瘡未瘳力疾鏖戰敗賊於禁江口已而友諒
中流矢死有言公之功者 上問之公曰天威神筭
臣何力焉 上益重之時友諒子理復立於武昌進
軍攻之其將陳僉同者驍捷善禦馳入中軍帳下
上方坐胡牀遽呼公曰郭匹爲吾殺賊公持鎗躍馬

奮臂一呼賊應手殞墜 上解所御赤戰袍衣之曰
唐之尉遲敬德不汝過也授驍騎衛管馬軍千戶從
征襄陽克淮安鳳陽安豐陞宣武將軍驍騎左衛指
揮僉事洪武元年戊申從大將軍徐公北定中原下
齊魯克汴梁平河南取元都破潼關彰德廣平所至
有功初大將軍遣公取通州公距城三十里爲營深
溝高壘爲持久計衆請速攻之公曰吾師遠來敵以
逸待勞攻城非我利也宜出其不意破之翌日大霧
公以千人伏道傍率精騎三千直抵城下元將五十
八國公帥敢死士萬餘張兩掖而出與戰良久公佯

敗彼乘勝來追伏兵中起截其軍爲兩道斬首數千級擒元宗室孛羅梁王遂克通州元君乃北遁克永平真定定州生擒守將湯同僉復從平章常公取太原守將王保保軍於城西公憑高望之謂常公曰彼兵多而不整營大而無備請夜劫之常公深然其計遣五十騎伏城東十里以舉火鳴砲爲期至夜公率十餘騎潛入其營舉火鳴砲伏兵亦舉火鳴砲常公引兵繼至鼓譟之聲相接保保軍大潰自相屠戮乃棄城遁下興州大同至沙淨州生擒僞將竹平章渡河取鹿臺西安鳳翔鞏昌追敗賊將賀宗哲於亂山

庚戌陞本衛指揮副使從征迤西克定西討西夏察罕惱兒撫安忽辰平章沙淨州復叛討平之克登寧州斬首二千級獲牛馬數千陞昭勇將軍本衛指揮使賜金龍衣一襲辛亥陞驃騎將軍河南都指揮使將赴鎮 皇寧妃公之女弟也 上遣至公第餞之且謂公素清儉賜白金二十罌廐馬二十二匹時河洛新罹兵燹邑井蕭條居民艱食盜賊充斥公宣布威德綏輯流亡申寬條明賞罰遠邇來歸者日以千計未期年戶口倍增境內大治丙辰移鎮北平河南士女不忍其去遮公馬數十里不得行甚至泣下旣

去爲立生祠北平初定羣胡反側不寧公開示誠款諭以理亂禍福人心遂安元左丞何允中等聞公之德來降者凡九千餘人 上遣使勞以上尊羊馬授龍虎將軍北平都指揮使賜誥命逾四年召還京進大都督府僉事更定官制改前軍都督府僉事灰山賊反承命討平之賜馬七匹辛酉從潁川侯傅公征雲南旣至命公及都督陳桓胡海分道進討道多險隘諸將欲深入公曰破敵貴先聲攻取必自近始舍近趨遠豈策之上耶遂先攻赤水河路距河二十里爲營時久雨河水暴漲公曰賊恃水漲不意吾濟下

令諸軍砍木造筏夜半濟河北曉賊始覺遂大潰生擒烏撒拜阿容諸蠻由是雲南諸賊破膽進攻曲靖六梁州關索嶺及僞右元帥山寨皆克之至江川犄子寨寨依山公先遣騎兵五千攻其前賊空寨迎戰復以精騎數百擣其後斬門而入火炮連發烈焰漲天賊乃亂悉破滅之進攻大理金齒降其僞官段平章攻安寧州賊將不花帖木兒棄城走破富民縣山寨攻靖寧州蠻七寨一日夜破之攻牢撞山寨取仁德府破哨店山寨圍姚安敗賊將李自久平蒙化州鄧川州破三營復光寨過金沙江攻北勝府生擒賊

將高生平麗江府平津等州前後斬首一萬三千餘級生擒二千餘人收精兵人馬數萬船千餘艘蠻民降者數十萬戶雲南諸路平論公功進爵開國輔運推誠宣力武臣柱國武定侯賜誥券食祿二千五百石子孫世世承襲乙丑加靖海將軍鎮守遼東丁卯同大將軍宋國公馮公討北虜納哈出降之師旋虜將追襲之公與戰創傷左脇箭復中右脇公佯呼虜傷吾甲我衆益奮連戰數十合虜遂却已而進征虜右副將軍仍鎮遼東戊辰出討北虜至捕魚兒海邏騎偵虜營不遠公乃令諸軍少憩飲馬銜枚卷甲倍

道而馳直抵虜營虜王覺乃率十餘騎潰圍出其將蠻子太尉來拒我師公手刃之獲兩營所積金寶珍玩圖書降其衆五萬餘人生擒虜將咬咬司徒乃曩冢太尉爽古達兒古不達刺王子等四萬餘人馬駝萬五千匹牛羊輜重無算師還賜白金千兩鈔八百錠絲幣四十匹已巳上以天下無事且憫諸將老欲保全之厚加賜賚遣歸其鄉公亦就遣庚午獨召還京上賜坐與語歡甚命統禁兵及在京諸軍蓋上春秋高知公忠謹特倚重焉辛未以虜酋阿扎失里寇邊命公討之獲其人口孳畜逐北至寒鴉山而

還丁丑川陝寇發勢張甚上顧曰非卿無能勝其任者授征西將軍印討之至沔之後河生擒賊首高福興及黨四千餘人公䟽其同謀者請誅之脅從者乞勿治且言有司不恤民宜正其罪上可之永樂元年癸未二月十七日卒于家享年六十有九訃聞太宗文皇帝爲之震悼輟朝二日遣官致祭賻卹有加贈管國公謚威襄賜葬京師聚寶山之原公孝友仁恕恭儉誠實出於天性母夫人嘗疾篤懸身燈告天求以身代疾遂愈人皆謂公孝感所致後母夫人卒公廬墓側晝夜號泣不絕聲臥寢於地毀瘠日甚一夕夢母夫人告曰地濕則致疾致疾則傷生汝固純孝惟竭忠報國爲父母光墓不必廬也公感悟而歸家三年之中哀痛如一日平居兄弟怡怡克盡友愛御軍行師動有紀律推心任之甘苦同之其攻克州郡必禁虜掠戒殺降封府庫收簿籍一錢尺帛不敢私嘗出征軍法夜必令親軍更直荷戈環帳立一夕風雪大作公悉罷遣歸營其愛卹軍士多類此家居簡靜好讀書天文地理百家之說靡不通曉教訓子孫以儉素力學爲務事太祖高皇帝四十餘年小心謹慎未嘗有過眷遇雖隆而自處益謙上嘗

御便殿賜坐適有奏事者公趨避之上曰卿第坐
朕自理事不汝關也其見敬愛如此時公卿多置田
產公獨不治上問之對曰臣一布衣荷陛下寵
靈叨有封爵子孫衣食餘饒安敢增益俾生侈心
上善之嗟歎良久公大小百餘戰金瘡遍體每陰雨
痛甚及聞征討之命卽日就道未始以老疾辭其事
上竭忠蓋如此予觀前史稱郭汾陽功蓋天下而主
不疑位極人臣而衆不嫉富貴壽考始終令節七子
八婿諸孫數十人俱膺顯仕唐世榮之若公勲業之
隆子孫之盛方之汾陽夫豈多讓皆由公秉心一本

於仁故積累之厚愈遠愈隆焉嗚呼偉哉

武定侯郭良

右軍都督府管府事武定侯郭良字存忠其先臨淮
人高祖英封武定侯再傳至珍當侯而爲其從弟珰
所奪後珍子昌復侯良其子也幼而孤未襲及長珰
子力與爭遂罷侯而授良錦衣衛指揮僉事至弘治
壬戌良母以請始復得侯正德二年六月卒輟朝賜
祭葬如例良世勲戚貴中落獨好聚書爲詩樂與文
儒交其爲指揮嘗中武舉推理衛事旣侯掌中軍都
督府事領京營牧馬虜犯大同充左叅將簡兵侯命

不果行而罷因上言備邊六策蓋武弁中之傑然者
正德二年良卒子勛嗣爲團營總兵加保傅嘉靖八
年作威福自恣楊一清惡之會御史論劾議 上奪
團營總兵保傅以張孚敬薦九年復保傅總兵提督
郊廟工二十六年勛奏乞進英干 太廟侑享禮官
言官及戶部侍郎唐胄皆言英不當侑享胄言尤明
悉勛請益力英竟得侑享十八年扈 駕巡承天進
封翊國公勛戇直好指摘人夏言惡之二十年都給
事中高時劾勛不法下詔獄移刑部獄諸大臣會鞫
論當死畱中勛死於獄久之勛子守乾得 旨准嗣

泰寧侯陳珪

珪揚之泰州人少隸行伍以善射充驍騎右衛騎兵
總旗洪武元年從大將軍徐達等平定中原授龍虎
衛百戶調燕山中護衛嘗從 上征北虜爲前鋒以
功陞武德將軍本衛千戶又從平內難數有功後侍
世子居守嚴督守備夙夜不懈累陞中軍都督僉事
封泰寧侯及營建北京置繕工命珪總其事珪經畫
有條理甚見獎重年八十有五卒 上輟視朝三日
賜祭追封靖國公謚忠襄

武安侯鄭亨傳

鄭亨合肥人父用開國功陞副千戶大興衛公嗣以
勇健持榜招胡幹難河陞指揮僉事密雲從靖難首
擒馬宣克薊州南破雄漠攻真定先登援永平敗遼
東兵充先鋒襲大寧夜率衆破鄭村壩上兵乘勝西
破紫荆關掠廣昌直抵大同旋軍大戰白溝河陷陣
大捷逐北至雄又南出攻濟南再攻滄州絕餉道南
驅至東昌戰敗西收散卒軍深州連戰夾河藁城並
捷巡徼至河上還屯完遂破東平汶上長驅至齊眉
山先鋒力戰戰靈璧大捷遂克泗州渡淮至江上入

金川門歷陞都督僉事封武安侯食祿千五百石與
世券永樂元年留守北京北鎮宣府繕諸屯堡八年
總右哨從上出塞敗本雅失理十三年領中軍從出
塞二十二年領左哨又從出塞還守大同獻陵卽位
充征西前將軍再鎮守大同防禦有方畧大同無虜
患是時邊將稱公及薛公祿宣德元年召還掌北京
行後府事未幾又出鎮大同轉餉宣府九年卒公嚴
肅謹厚善撫士廉潔耻掊克人不敢于撓卒贈漳國
公謚忠毅妾張自經殉贈淑人十年子能嗣坐法立
功邊塞正統六年復爵卒子宏十二年嗣卒子英成

化十三年嗣卒子綱正德十二年嗣

鎮遠侯贈夏國公謚武毅顧成神道碑

楊士奇

永樂十二年五月二十五日鎮遠侯顧公薨於貴州
計聞上震悼遣官賜祭追封夏國公賜謚武毅賻贈
如制命有司治喪葬遂命其嫡孫興祖襲封興祖奉
柩歸葬于揚州之原顧氏之先居湘潭公之曾大考
百四妣 氏大考千二妣朱氏始家江都考萬一妣
周氏公諱成字景韶天性仁厚自少能矜恤鰥寡負
直氣遇以橫逆加人者必摧辱使畏服乃已其大考
嘗詫於衆曰是孫必興吾門公道貌魁偉少知書通

大義而膂力絕人善武事尤精騎槊射命中元未嘗
遊燕都有強寇十數劫其舟同載者皆驚愕公獨奮
出鬪寇皆披靡走旣歸張士誠起泰州僭王號公知
其無能爲乙未歲我太祖高皇帝渡大江明年公來
歸附至鎮江號勇士十一人轉鬪入城莫敢嬰其鋒
者旣敵益衆而後絕悉爲城中人所繫十人者皆被
殺公奮躍起繫絕蹴持刃者什之脫走歸語衆曰鎮
江城中皆庸夫可聚屯遂導衆攻其城克之授百戶
從攻常州宣州皆克之簡克旅正還從克江陰從寧
河王克通州陞千戶攻雙刀趙於樅陽攻安慶江州

池州興國諸砦寨皆下之庚子敗陳友諒兵於龍江
公得其戰艦及馬特賜白金友諒退仍據安慶江州
公隨大將軍悉復之并得其八陣營諸寨從克南昌
援兵豐敗元兵進攻廬州從克武昌荊州衡州從開
平王下襄陽還取泰州留守興化從中山王破舊館
克湖州蘇州洪武元年陞堅城衛指揮僉事二年領
軍克信陽唐光四年從臨江侯取西蜀道遇敵公手
殺敵伯餘人生擒二十餘人進攻羅江生擒其僞元
帥及其下二十餘人悉送軍門斬以徇入漢州僞官
戴丞相向知院者盛兵迎戰公揮衆奮進戴向皆狼

猥還走追北至城郭圍其城竟降之蜀平調成都後
衛總帥以公守之六年率兵赴重慶擒妖賊王玄保
及爲萬戶李邦祖等八年調貴州衛明年甕傍等山
寨蠻寇叛公率兵討之斬首百餘級俘獲人馬尤衆
夷懾服叩首請歲納租賦公從之其僻遠山峒有負
固未下者次第平之于時群夷叛服不常公連歲出
兵平之前後俘戮不可勝數十四年從潁川侯征雲
南率步騎兵爲前鋒首克普定畱公守之且爲後繼
公部將士樹柵以守明年公出兵克西堡是行諸蠻
合數萬攻圍普定諸將皆欲出戰公持不可曰賊衆
我寡一出卽爲賊所窺必俟其攀柵乃出賊及柵公
披甲上馬出北門率戰士奮進手殺賊騎之迎戰者
十數人賊衆引却諸將遂乘勝出東門西門戰敗賊
衆時南門之圍未解公取所生擒者十人斬之而縱
其一人歸曰吾以夜二鼓來殺爾矣及期賊聞官軍
舉銅角銃鉞皆惶懼奔走圍悉解獲賊甲兵無筭時
有中使在普定見公勇略絕群還奏特遣賜龍衣金
帶陞世襲指揮使凡普定所隸諸蠻公悉平之十七
年平阿黑螻螂等十餘寨及降尾灑蠻酋馬乃之衆
西堡蠻攜貳復平之廿一年總戎檄公討平乖西扒

古里谷勞金網等寨遂擒關索嶺首賊葛蓬及叛寇
阿東皆誅之士官阿宗叛焚劫驛舍乘虛將攻公勢
張甚時官軍精銳悉駐東川公率餘衆及士兵深入
賊地據關口屢敗之賊旣遁衆以暑瘴非士卒便欲
退師公不聽未幾賊黨殺阿宗降遂奏革普定府而
黜其守之懷二心者建兵衛以屬其民析其地爲州
三長官司六而公統理焉自是公悉意撫綏大布恩
信諸夷嚮服二十五年夏入朝賜文幣二十副鈔三
千貫白金四百兩日錫宴會同館陞鎮國將軍貴州
都指揮使司同知公至貴州首征康佐叛蠻破阿老
諸寨峒二十七年平都勻豐寧西梁瓦材等寇斬首
萬四千餘級俘生口三千八百有奇而撫其良善二
十九年陞驃騎將軍右軍都督府僉事官其長子統
普定衛指揮使是歲命公佩征南將軍印總兵征水
西叛寇生擒賊首敬德斬之餘寇悉降三十年五開
蠻反公率兵至剖天峒悉破之進勦天柱天堂春花
金酒井滿頭大小坪等生苗及螃蟬米毫灣溪萬潮
等寇皆破之三十二年普定西堡及貢州光金谷勞
里金石番羨唐諸夷復叛公次第親行誅其叛首而
撫其餘衆旣歸明年高廟上賓及明年太宗文皇帝

靖難之師起北方公受命往禦至真定靖難之師執
公以獻文皇識公先朝舊人解其繫與之語曰豈非
皇考之靈以汝授我乎因語以不得已興師之故言
已泣下公亦泣遂遣人護送北京令輔仁宗皇帝居
守時姚廣孝奉命輔居守有腹心之寄姚素不習兵
事與公議多不合會南兵圍城仁皇於軍旅調度恒
從公言城中文武之臣競進曰顧成南將其中莫測
不可專任然公所言計皆合機用皆有效數命公出
將兵固辭曰使臣侍左右日陪論議得效分寸足矣
賜公甲冑刀劍弓矢皆不受南兵數圍城卒以敗去
者多用公謀也洪武三十年九月論公功賜號奉天
翊運推誠宣力武臣特進榮祿大夫柱國後軍都督
府右都督封鎮遠侯食祿千五百石子孫世襲賜鈔
三千貫白金一百兩綵幣三十四副遂賜誥券是冬
命公鎮守貴州蓋以公威信素行於彼云永樂元年
春至貴蠻夷聞公至歡趨出拜叛者皆歸境內靖寧
公上書論大計謂國家宜早建儲以正名分北邊官
軍有功者爵賞既定宜制以禮法降勅褒答賜鈔五
千貫綵幣八十副申賜鈔萬貫白金二百兩綵幣如
前三年賜誥追封三代考皆鎮遠侯妣皆侯夫人永

寧土官宣府爲其弟謀殺致其下亂公執其弟送京師罪之而從土俗奏以宣府妻襲職其衆遂靖六年車駕將巡狩北京豫召公副儲君監國既至上慰勞再四且諭所以召公之意公言皇太子仁厚恭勤明達足任付託且左右文武之臣其智識深長皆非愚臣所及蠻夷雖今帖服小有競爭卽恃兵爲亂愚臣非敢決意去畱惟陛下命之上忖知公意嗟嘆累日賜鈔四萬貫白金二百兩綵幣三十有六副命還貴州陛辭退辭文華殿曰殿下於事君父恤兵民素行有誠惟於小人當眞度外萬事有天理不足計蓋是時懷奪嫡志者不樂公在京師公燭知故先幾引去也時土官奏欲爲公建生祠從之公之赴召也播州貴州蠻作亂公歸遣子勇率兵勦之悉平時思州臺羅等蠻亦亂公遣人諭其酋普亮即服於是公病事聞遣醫馳視竟不起春秋八十有五公自少壯履行陣挺身戰鬪奮勇無前雖身被十數創不稍引却必致俘馘見功效深於籌略料敵制變百不爽一於謀國事明大體不瑣屑細故竭誠奉公至老死不倦諸葛公所云鞠躬盡瘁斃而後已者公盖有焉

鎮遠侯顧興祖

興祖永樂中嗣父爵未幾奉勅領湖廣貴州諸軍征
剿廣西諸峒蠻賊宣德初召還正統間總五軍左哨
兵尋總操神機營以神機軍士爲五軍外圍遇敵至
則當先摧敵慮恐敵出不意或值風雨陰霾鎗銃火
器倉卒難用無他兵器可以拒抗諸每隊前後添設
刀牌上從之十四年從征虜自土木走還降都督同
知守備紫荆關景泰初命爲征遠伯天順初復侯爵
命往南京協同守備至是卒計聞遣官祭葬

鎮遠侯謚襄恪顧溥神道碑

李東陽

昔在弘治庚申孝宗方注意邊務京營將臣皆悚栗
辭免 上御平臺宣內閣臣造膝咨問面賜簡擇尤

慎團營之選因出廷薦姓名指鎮遠侯顧溥曰何如
皆應曰聖諭甚當再問臣東陽對曰溥在湖廣誠佳
又新有貴州功無以易此上乃視手勅草親灑宸翰
付兵部驛召至京師一時輿論稱爲得人越五年而
侯卒嗚呼惜哉侯字宗泰先世自長沙湘潭徙揚之
江都高祖諱成從太祖定天下累功擢後軍都督府
右都督及從太宗靖內難授奉天翊運推誠宣力武
臣特進榮祿大夫柱國鎮遠侯仍前都督事贈夏國
公謚武毅曾祖諱統普定衛指揮使不及嗣贈鎮遠

侯祖諱興祖嗣侯爵鎮貴州掌右軍都督府事領南
京留務伯父諱翰早卒其子嗣卒無子考諱玘亦早
卒侯以成化癸巳嗣爵時年方十有三憲宗特命朔
望朝謁尋以例與公侯伯幼少者入國學肄業因涉
獵經史尤精韜畧習楷法間持節冊肅唐二王久之
用薦掌五軍右掖弘治戊申孝宗親耕籍田充三公
行五推禮又以登極事往告岷王已酉始有湖廣之
命佩平蠻將軍印以行政令簡肅官屬才俊薦拔幾
百人黜不職者稱是諸衛歲給柴薪及軍從錢悉拒
弗納桑植安撫司土官殘虐苗人駭之奪其印以迎
侯督兵捕得首惡或諷令盡殲其黨侯曰苗爲貪
所激非叛也具首從法上活五百餘人貴州苗僞都
順王號滇蜀道梗侯受命統諸路兵十萬討之先正
紀律戒部曲侵掠比至境覘知逆順雜處檄不從亂
者毋得驚擾由是四百餘寨皆獲保全有邏者報云
路險寇衆不利速攻諸將頗惑侯厲聲曰今王師大
集勢且百倍何疑之有卽授方略分爲五路自帥精
兵由間道刻期並進賦駭愕奔潰生擒僞王妻子及
諸僞官斬首百千萬級招還流徒五千餘戶修復爛
土長官司奏剏都勻府二州一縣境內悉平上降勅

獎勵詔班師還鎮論功加太子太保增歲祿二百石
特賜誥命加贈三代考妣及其配嘗乞解兵柄疏三
上及被召又辭優詔弗許去鎮之日文臣武士下及
兵民皆悉戀不忍釋及督團營兼三千營掌前軍都
督府事益持重守法與中貴臣閱視諸營內外官簡
選軍士及督工修繕禁門城垣社稷壇事皆集以母
喪乞假歸葬上命其弟錦衣衛千戶淵代之行自出
鎮至是被賜白金文綺寶鏹佩刀蟒衣珍饌諸物不
可勝計癸亥有疽發于背上命御醫診視遣中官備
物臨問六月十四日訃聞上震悼輟視朝一日遣官
諭祭者十有五給賻米百石布百疋令有司具棺槨
治葬事賜謚襄恪給驛歸其喪歲未盡二日塋楊城
南茂菴灣夏國公墓次侯生天順辛巳三月十七日
年止四十有三侯純雅簡言笑厚倫重義居官蒞下
寬嚴相濟處家儉朴雖都重位囊無餘貲英國張公
懋爲出布帛以供歛事此張公所親語者因相與歎
羨以爲不可及譽聞方隆而勲業未究獨非命哉
在湖廣嘗愛牡丹花日令軍人負水灌之有一僧人
偶問此水汲自何處路遠近幾何溥知其諷已也即
謝之曰微僧言何以知過其勇于從善如此

鎮遠侯榮靖公顧仕隆 鎮遠侯榮僖公顧寰

謝廷諒

榮靖公姓顧諱仕隆字仲勳別號葵齋江都人其先
湘潭人自六世祖武毅公徃來江淮間遂居江都武
毅公諱成狀貌雄偉驍勇過人有膽畧而又喜習武
事自文其身以駭俗見者以爲非常人侍 高皇帝
宿衛出入馴謹從平蜀破黔中蠻克普定已而征雲
南公爲殿晉征南將軍鎮貴州征五開六洞一百三
十七寨悉平斬獲功多進都督僉事已而 文皇帝
遣至北平侍 仁宗居守有功遂以右都督進奉天

翊運推誠宣力武臣特進榮祿大夫柱國鎮遠侯食
祿一千五百石與世券又出鎮黔號令嚴肅震懾諸
蠻搗臺羅寨斬叛酋普亮滅其家葭葦窟伏之徒莫
不嚮風慕義沒而蠻中各有祠贈夏國公有八男子
弗嗣孫興祖嗣竟以從征失律遂失侯 英宗復辟
而始復也出鎮貴州有戰功加祿三百石子翰宜嗣
慕延陵高節讓其弟玘未及嗣亦卒復以翰之子
淳嗣侯卒而無子以淳之從弟溥嗣之溥固夏國公
諸元孫而玘之子也謚襄恪自襄恪之嗣侯而侯家
世世不乏令人矣襄恪公初遊太學韜精翰墨久嘗

總兵團營掛平蠻將軍印鎮武昌擒貴州苗之僭稱
王者滇蜀往來道始通還流移五千家復爛土長官
司設都勻府增祿二百石然爲人潔白自守家無餘
財英國公張懋爲給布帛供歛事顧氏之子孫賢者
多厲布衣之節有繇然矣襄恪生榮靖榮靖生而不
好弄也穎而馴沉嘿異凡兒襄恪爲擇明師之嚴憚
有法度者程其起居授以章句大義無不了了迺更
善爲詩歌訪昭明太子纂輯文選處而想見江都相
之下帷發憤也念以爲謀利計功自嗜慾始彼三年
不窺園事者豈獨其功課勵哉蓋亦有操尚存焉栖

息衡門晏如也卽以 孝廟甲子襲侯爵而華悅無
所感大抵其樸愿之天性然哉退朝家居蕭然如寒
士上知其廉特命兼支米饒千石中半凡冊封遼荆
慶三藩饋遺無所受薦廣滿公車典司神機管戎務
會 武宗登極賜賚勲臣視學祀先師 命坐聽講
賜宴饗舉朝以爲榮俄兼管紅盔將軍復領圍宿禁
兵帶劔侍衛奉 勅管理官軍牧放馬匹一時勲臣
中材猷幹畧無出公右者朝廷方倚公爲重會漕政
久壞督漕總兵難其人咸推轂公公素有慧業多心
計凡錢穀之出內庸直之支給綜核精審便宜斟酌

而盈縮焉歲得羨餘金以萬計漕政一新公在淮十
餘年疏凡二十餘上皆鑿鑿可行其大者謂士卒之
冒寒暑勞瘁餉道晝夜不能休 仁宗下詔哀憫有
附載什物者勿禁都御史馬文升復申明之而刻核
吏抗旨苛索不近人情臣以爲寬一分以振羈人之
困乏可也私鹽則禁耳又數爲士卒請月糧士卒之
歿而旅襯無所歸奏請恩卹軍士無不感泣者公復
有疏開會通河司空王公軌申請之至今稱便蓋唐
都關中宋都河南皆由汴由渭直達京師未聞有貯
國儲于五十里之外者 國初僅有神武中衛小倉

耳因漕運後期斃將京儲收貯通州以待轉輸因循
苟且歲月遷延權勢家車輛日伺而乘上之急牙儉
趨趨吏胥破冒猶其小者邊關塞堡間道可通倘有
爲之嚮導者而輕騎疾馳旋日至或據倉廩或肆燒
燬國儲不一空乎且京城大通橋至張家灣一帶河
流爲元時轉運通渠也當都水監郭守敬疏鑿通州
通惠河引水置閘興工之日世祖命丞相以下皆親
番鋪爲之倡永樂間亦循故道抵京竟爲浮言所沮
正德元年始一行之奸徒倡議復中止夫運糧至農
務與秋雨降泥濘不得前與人索厚直費且不貲節

浮費以舒民困興國家自然無窮之利杜後世意外
不測之虞計無過于此者嘉靖庚戌虜果薄近郊闕
通州廩粟賴此舉也而全人咸追服公之淵迴大畧
云逆賊劉七擁惡少劫掠江淮間焚運舫公上疏自
劾有 詔勅公相機勦捕公募驍勇扼其吭賊窘入
海困狼山無一得脫者宸濠反 大駕親征御龍舟
自徐州順流而下至清江浦巡幸至所捕得魚鳥分
賜左右受一鬻一毛獻一金一帛佞臣彬指麾南都
及齊梁淮揚廬鳳之迎送文武官如蟻不時傳旨號
召徵索無厭旗牌官許縛黽縣長吏如隸卒有郡倅

懼而縊焉成國公長跪媚彬求活公獨抗首稍不爲
屈彬怒數窘之會 上至淮安屏侍衛徒步入城幸
公第彬方矯詔索民間鷹犬珍寶古器懼公發其奸
亦未敢間公也比江西之捷聞論功陞賞公與馬湖
南固龍潛地也延袤數千里五谿三苗素難馭宗室
中多行不義而遼爲甚公嘗使遼楚人高其義 世
廟素習公名登極初卽用公鎮守楚已而淮之軍民
耆舊謀從闕下借公一年不獲遂勒石立碑頌公清
謂公在淮十年如一日餼廩外一無所取也 上聞
而賜勅褒諭併賜白金綵段未幾召還提督三千營

操練俄攝右軍都督府事仍兼營務會京師地震下
詔修省遣公祭告天地山川二年二月丙申 孝惠
皇太后梓宮至山陵祭告后土天壽山及七陵癸亥
以久旱風霾祭郊廟八月戊戌祭太社稷二年七月
巳卯恭上 聖母尊號七月甲申奉迎 恭穆獻皇
帝神主至京奉安于觀德殿祭告羣神皆公典其事
八月癸丑 賜手勅特加太子太傅調掌中軍都督
府事提督都門鎖鑰兼督三千營如故以奉迎防守
功居多故也 興獻帝大禮會議者十公仰體 宸
衷俯拾輿論不激異不黨同中外倚以爲重屢賜

恭穆獻皇帝宸翰

御製敬一箴洪範序文獻通考

諸書先是錦衣千戶王邦奇者以汰去疑詔出大學
士楊公廷和手乃上疏陳邊事言哈密失國番夷內
侵由彭總督賂番求和邀功啓釁總督譚澤於是爲
大司馬矣邦奇奏復舊職爲其所抑心懷怨望文飾
奸言詬辱大臣波及費石二執政激 上怒愈深逮
繫楊公諸子婿省臣楊公言抗疏忤旨公覆議申揀
謂廷和當權奸專橫之日保全神器歸于陛下持危
定傾功亦不細矣邦奇小人假邊情肆邪說惑聖聰
傷國體此之謂利口亂政宜放諸四夷者也夫察上

論王
邦奇

宮之詐白伏波之寃千古以爲美譚奈之何惑一羣小而使堂陛之凌夷至此天下後世謂陛下何如主義上有詔切責公公遂移病乞假 上命休沐暫解營務俟公愈公竟以七年己亥卒于官於是年四十五矣訃聞 天子輟視朝一日贈太傅謚榮靖 論祭十五壇遣官營兆域太師楊文襄公一清銘其墓公寢疾時謂其子寰曰吾能以清白吏遺汝汝獨不能以清白吏事我乎殯葬當稱家所有爲之慎勿作佛事寰奉教惟謹寰字君錫生而魁岸奇偉不與羣兒爲伍獨敦詩書而悅禮樂爲小侯時流覽百氏遠識沉通室嗜欲寡言笑資貞幹事廉隅其嗣侯也爲肅皇帝七年姿儀端潤趨眄淹華每朝會上顧列侯中獨視偉公明年授五軍營坐營又二年將諸陞楯郎直宿衛小心忠謹止進有常度甚見親信給事中魏良弼者持論不阿當世首薦公十二年僉左督府事坐鼓勇營其年改中督府十四年守備南京 賜金綺以行先是三法司獄囚五年一審情真矜疑奏請發遣自正統初遣巨璫金英遂著爲令內豎驕恣張蓋擁騶從入寺堂而高拱南嚮坐自以爲王人位諸侯之上御史大夫西向坐侍御史至貴倨也從郎

曹引囚廷審大所不堪 肅皇帝在王邸中知民間
苦內豎桀鷲罷鎮守十六年特以武定侯暨夏李二
大學士理冤獄罷內豎不與已而武定侯題稱南京
及各省南北直隸一體會審特允所奏 勅公欽卹
大獄公奉 詔讞訊所釋大辟十九人稱明允十七
年南都春漲衝齧 詔公祭江神修陵寢 孝陵工
完賜公及永康侯等金幣有差俄掛印充總兵官提
督漕運鎮守淮陽淮陽之追慕榮靖者故老扶杖郊
迎公相對唏歔泣下取榮靖公所撰漕規數帙置几
案肅規曹隨層暉世德有大小馮君之號焉先是運

舸迴避梓宮不得前梓宮發而河流溢逡巡而北凍
裂層冰阻阨者幾二千九百餘艘河泮時始得還則
後期不復能領運矣且所在災傷民不堪命兌運亦
不能如期會發徵公奏請暫將前船免一年轉輸計
所轉輸可九十六萬七千四百餘石卽以各災傷地
方量准折色同本色米以時入太倉一以省凍阻之
役一以振黎元之乏兌運無虧軍民兩便 上嘉納
之公復條陳七事一謂有司當交兌時擅繫官軍詣
簿對頌繫旬月曾不得脫身而供王事愁苦無所訴
今後一切詞訟俱俟役竣會漕司問理無得逕自拘

繫一謂運官赴尚書期畢其役於治粟內史其他寺
署候交軌席等務可不謂非王事哉而槩以後期叅
究非人情也米入倉之期不失可幸無罪矣一有司
審編旗甲須覈戶丁報漕司如有逋逃侵盜者選編
者一體連坐安所逃罪一輕齎銀抵都方給予有起
剝無辦者將米價賤鬻比入太倉而廩不足此輩寧
頑無知宜聽把總酌量疏實以報一各倉交糧宜用
刮鐵收受禁軍人無得高下其手或多增斛面以致
虧耗一每版交席六千止用三千不用者朽今但將
三千隨米交倉餘令折銀交庫一運官犯法懲劓則
有漕司刁軍擅赴隔別衙門挾告何也固上行私冠
履倒置漸不可長奏入 詔悉如議行之議行而謗
興矣失職有誅侵官有罰漕事肅清權行州域而競
逐於京師仇厲於官署馳鶩於洲渚者飛語中公言
官不察厚誣公波及張總督總督竟罷斥而直指御
史按驗公無罪罪在言官言官遂以計典逐而公復
僉書右軍都督府事俄 命神機營坐營淮陽人德
公深願復借公一年 天子許之有獻策取安南者
安南都統使莫福海歿子宏瀝當襲職族人莫正中
欺其孤幼陰欲謀奪而官屬范子儀等助之賴官目

黎伯驍仗義擁衆羽翼宏瀛得不死正中窮蹙亡命
入中土子儀亦潛住永安兩家之難結詭詞搖惑侵
擾內地粵塞不得寧而廟議以爲憂 上乃命公鎮
守兩粵便宜行事 陛辭大加賞賚示寵渥總戎藩
臬以下俱受節制與提督同提督侍郎周公延亦忠
介人也與公同心計畫送宏瀛還國襲封真正中仍
安置原所勿遣懼宏瀛新襲職事權未定復生他釁
也先是廣西桂林平樂猺獞破掠城市殺縣令百戶
馳赴拯援被創不能鬪賊勢猖獗大肆焚劫連歲無
虛月公至而蕩平之凡擒斬四百八十四平獲男女

三百四十四牛馬器械甚衆捷聞

賜金綺并及僉

事茅坤以下有差是役也或有議召募四方兵集粵
大創之者公獨守營平計務在持重奏停大征相機
備禦百姓安堵而寇亦殄矣當是時鄭端簡總督兩
淮移書聶貞襄云顧平溪孝友廉靖端毅宏達漕務
非此人不可公遂去粵入淮淮陽之人喜可知已公
凡四鎮淮始終如一日方間居對端簡言先榮靖之
蒞淮也值濁亂之朝不願見奄人願得優游股肱羈
乃其時遊幸騷動妖賊竊發至旁皇也至以孤之不
肖而天幸際聖明無一事海不揚波夜無桴儼與公

等投壺雅歌致足樂也無何倭寇通州如皇海門等處如臯縣令據城以守公亟集兵餉分守洋麻港雲梯關廟灣東西海島要害倭悉殲有 詔嘉漕運侍郎鄭曉鎮遠侯顧寰有運籌決勝功賜金綺而總督京營之命下矣先是 武廟集九邊將突騎數萬人聚京師號威武營 上自爲大將軍江彬許泰爲副將軍而十二營自如嘉靖初散邊兵用武定侯郭勛爲帥二十余年培克鉅萬中外切齒尋得譴以去而代之者成國少不更事至庚戌之變而兵出死禦者不可勝數咸寧侯仇鸞奏調邊軍驍勇者數萬人隸

近畿陽言京兵雜征戍陰匿占鬻遣如故肘腋之間厠以豺虎蓋人人寒心也鸞歿而磔其屍正其罪代之者愈益甚至是命公總督京營戎政人人舉額歡聲載道謂公爲名將家子且所在廉平澤南洽而威北鬯矣語具元美氏兵制考中時 天子居西壽宮修祕祝祠天帝五帝太乙諸神作大光明殿及玄熙玄都諸殿玉熙及新宮而會奉天三殿及朝門裁又戒虜築長城起永定七門修蘆溝橋諸大繇作公時督諸軍具畚鍤助諸匠工 天子益憐其勞進宮保下 詔褒予數被金綺之賜時輟大官珍醴藥物賜

之親寵於諸侯爲冠有省臣游甲者議京營諸衛兵
雜各營無可稽覈請以大小衛分配一衛專隸一營
部覆議從之矣公力陳以爲不可謂五軍營每營妙
選三千餘爲備神樞神機兩營亦選其強壯者聽調
倘序衛順管而分配之無論改隊伍不便秋防在邇
兵與將不習強與弱混殺何以禦敵乎 上可其奏
而戒部臣勿輕覆諸建白亂舊章者公復條武備者
八刷班軍者五皆切中時宜 天子以爲能或謂春
防急矣破敵摧鋒須戰將 肅皇帝拊髀咨嗟有頗
牧之思焉數密諭輔臣較覈熊羆士文武大臣中有

能備干城衛社稷者乎對曰亡有帷幄運籌有鄭曉
而曉老矣顧寰雖非戰將練京兵善操縱京兵素驕
媚操未畢而遁叅將縛其人矢貫其耳一軍皆譁寰
撫諭乃定蓋寰之得士卒心已久王甲論寰不過爲
陳劉地劉固好談論人夸張躁率陳之貪暴誰能堪
之此二人者必不可用也於是特命都御史李燧協
理戎政佐公卒未有易公而代其任者夫以 肅皇
帝之威斷不測臣下凜然揀過惟恐不瞻乃君相間
相與謀度注意公如此其篤也此非其忠誠惓惓憂
國奉公如渴饑烏能結主知而怡泰乎迨 肅皇帝

主山陵 穆宗 今上相繼御極凡舉大事必先遣
其在營府有事于郊廟必充上公徃禮成必加賚陵
寢壇墼耕籍大闕亦如之間復遣行督漕旋復召謂
老成人典刑不宜辭殿陛也公竟以老屢疏乞休
天子重違公意益褒予加少保奉朝請蓋異數也其
後二年乃卒年七十有九計聞上震悼輟朝一日賜
祭十六壇贈太保謚榮僖 勅所司營治兆域一如
榮靖云榮靖公寬弘簡質造次被服一於禮雖燕居
非衣冠不見榮僖公端靖廉明溫柔孝友寡翫好而
多幹畧以勲名終自襄恪至公世篤忠貞弼諧 六

聖無失德無間言皆有功烈知名當世庶幾哉列於
方叔召虎仲山甫之林矣榮靖公所著有漕運總錄
二卷藏于家其他奏議數十卷榮僖奏議在漕河者
十兩廣者再京營者十六俱明贍淹該文臣中自以
爲不如也榮僖沒而請謚時適與英國同或謂英國
班首官聯宜子謚禮卿執不予曰英國鎮遠同時物
故而鎮遠侯一生苦節乃與索賂三千者同謚耶旌
痺之謂何執政以爲然英國竟不得謚獨謚公朝臣
益知公之姱節好修矣 論曰余宦遊兩都未嘗肯
遊權貴間子雲筆札猶然羞之况以唇舌饜五侯鯖

乎臨淮西寧賓客輻湊若將浼焉彼恂恂如鄙人口
不能出辭而中心誠信於士大夫者可多得哉卽衍
衍緣飾儒雅終被輕媿之名迺鎮遠侯之門德家聲
何其敦樸也雪坡公讓爵于其弟弟雖弗嗣弟之子
業恪再傳榮靖又再傳榮僖而皆以其身衛社稷高
流時譽歛然稱之鄭端簡至追恨彭楊林徐四公叙
名臣不及武勲也端簡於榮靖稍論次其槩矣榮僖
木竟榮僖雖與端簡相厚善蓋棺在端簡後胤絕輝
淪名體寂篋識者悼之所建氏始博採羣書考歷朝
祕錄授余傳榮靖因及榮僖昔孟堅氏叙家傳而先
伯旂康樂侯述祖德而先太傅所建亦然乃所建之
尊人貞白先生琅琅大節足紀也具李本寧傳中余
弗論論所建之所繇表揚其先德者如此云

鎮遠侯顧承光墓志銘

葉向高

鎮遠侯顧公有子大禮嘗師事余于成均迪訓惟謹
余以世祿由禮重之顧公旣沒大禮當嗣侯將以其
年月日葬公于都東門外十八里之新阡泣請于余
先生若憐不孝孤敢以先人之志若銘請余不能辭
按狀公諱承光字思謙別號仰葵公世祖成自楚湘
潭占籍江都歷事高皇帝文皇帝有大功勞封

鎮遠侯贈夏國公謚武毅語具國史中武毅生贈侯
統統生侯興祖興祖三傳至侯溥溥生太傅榮靖公
仕隆榮靖生少保榮僖公竄及贈侯宇宇娶宜興徐
氏爲太傅文靖公曾孫女生公公少卽爲榮僖所器
嘗鎮兩粵挾公與俱多用其籌策迨榮僖且老未有
後意屬公欲畱之而贈侯以守夏國墳墓居江都榮
僖沒不得已裝如京師哭榮僖甚哀竟襄事無遺力
復欲有所推讓度不可乃嗣侯則五析遺產以四畀
諸季父昆弟躬取一馬人皆難之侯六月 特旨簡
公典殿前大漢將軍 賜蟒衣侍 經筵劔復上殿

後改僉前軍都督府事典 禁直官軍禁軍率虛名
冒糧驕甚公覈而飭之稍稍奉約束周廬巡徼肅然
改觀累奉 命祈雨 北郊祀 歷代帝王兩祀
獻 裕二陵一祀 長陵一祀 茂陵 賜白金文
綺及他珍物有差而當祀 獻 裕二陵歸以冒霜
雪得疾請告謝政踰歲 予假歸江都視先隴且用
侍衛勞給傳行又踰歲還朝復請休沐時壬辰冬也
自是杜門養疴不關時政惟國家慶恤大禮必力疾
冠帶肅拜不以謝事故廢更七閱歲告終爲戊戌七
月十九日距生嘉靖丁亥二月二十五日得年七十

有二公雖嗣侯十七年而在朝之日不能半小心恭恪始終不替性孝友居父母喪三年不內寢撫弟姪及宗族皆曲盡恩意折節下士所交多海內名流尤好藏書至萬餘卷弱冠游郡庠卒業國雍凡七試有司不利意尚未已晚年猶語人曰吾馮藉國恩冠蟬佩玉雍容貴顯矣然使得一挂名鄉薦書乃公豈以此易彼哉蓋其趨向如此病中每遇賓祭必罄折盡禮昧爽必櫛沐趣家人起治事臨沒復病瘍嗣侯延醫治之輒謝去安命達生所得于學問多矣元配卞夫人江都卞某女繼胡夫人武進胡某女男一卽禮貳室余氏出孫男二鳴道鳴達孫女二卞夫人并余氏初葬江都大禮將迎祔公穴史氏曰世病世胄謂統禱習耳顧公起諸生乍貴津津故業不欲以徹侯輕一第此寧有汰心者哉余在成都嘗語嗣侯忠孝大義母以七尺軀空糜豢養嗣侯唯唯以今徵公如此微余言公庭訓弘遠矣 銘曰綿綿河山來自荆楚江都始基爲國牙距卓彼武毅天挺雄姿草昧是力奕世勲施七葉榮僖厥胤弗續公自江都來續其玉簪笏趨蹌有美公行禁旅弗肅乃抗戎章國有大祀惟公竭蹶霜露園陵駿奔對越 帝用嘉只錫

賚駢蕃公拜稽首母忘渥恩二監溘侵逍遙以聽羈
繼弗嬰考終無慢周原鬱紆芥如防如惟公之居竟
鳧樂胥

永康侯追封蔡國公謚忠烈徐忠神道銘

楊士奇

公諱忠字仲達姓徐氏世家廬州之合肥父諱用元
季守宣城我太祖皇帝兵至宣率衆歸附命仍其
職遂從征討以功實授管軍百戶從守南昌進武畧
將軍河南衛副千戶洪武壬戌自陳老疾命公代之
丁卯從征北虜至哈刺哈之地還城大寧無幾調大
寧備禦戊辰從征金山之虜之爲邊患者屢戰敗之
獲其馬牛輜重賜白金鈔幣庚午運兵饗數十萬斛
赴溫口遂從征乃兒不花大敗虜衆俘獲其人口萬

餘總兵遣公護送入關公悉心撫卹俘者如歸陞濟陽衛世襲指揮僉事乙亥城懷安萬全丙子率兵從征北虜至驢駒河而還丁丑往填開平巳卯 太宗皇帝舉靖難之師公首從義旗克密雲克雄縣真定取永平克大寧還戰鄭村坨取廣昌薊州戰白溝河皆奇功進攻濟南克滄州大戰東昌及夾河攻彰德破西水寨克東阿東平汶上大戰靈璧遂從渡淮及江至京公臨戰奮勇百夫莫當出入敵陣率在衆先白溝之戰敵揮刃斫公兩指未殊公自斷指擲地裂衣帛裹創仍奮進戰其馭士卒撫卹誠至人人歸心

而號令嚴明所過無擾 上行師恒飭諸將毋妄殺曰吾奉天弔民厲民違天何望有濟公承命顓顓惟執兵迎拒者不容而誘諭招徠綏撫降附多效力焉其以功進官自指揮同知歷都指揮僉事授奉天靖難推誠宣力武臣特進榮祿大夫柱國前軍都督府左都督永康侯食祿千一百石子孫世襲賜誥券追封曾祖六二祖七九及考皆永康侯曾祖妣陶祖妣王妣張皆永康侯夫人永樂巳丑暨癸巳 車駕巡狩北京 仁宗皇帝監國 上以公敦厚老成畱之南京兵政一以任公公小心寅畏清靜簡易上下咸

宜之一日夙興盥櫛衣冠坐都督府得風疾遽卒癸巳八月二十四日也 上在北京聞計震悼輟視朝一日遣官賜祭給賻命有司治喪葬追封蔡國公謚忠烈并加封其三代考皆蔡國公妣皆蔡國夫人配亦蔡國夫人 仁宗皇帝在東宮遣祭賚賜甚厚公沉毅質恪有孝行旦暮出入必先詣家廟事繼母敬愛兼至小有訓責必跪受雖貴不變所得 上賜必謹視之約已守法未嘗有過接人恭謙和氣滿容語簡而誠洞見底裏春秋五十有二而卒卒之歲十一月二十七日葬江寧縣安德鄉長岡之原

隆平侯張信傳

張信臨淮人父興開國功爲人指揮僉事信嗣官

紫江草塘功陞都指揮僉事洪武三十一年建文君卽位疑北平大臣薦信有謀勇名調北平都司受密勅令與謝貴張昺合力盡縛藩府人信日夕憂憐母怪而問之信跪對曰兒統兵邊陲焉能無憂母曰汝非此憂其語我故信屏左右對曰密旨欲得親王奈何母大驚曰不可汝父每言王氣在燕汝無妄爲禍家族信益憂懼未幾勅促信益急信艱然起曰何忍已甚至此三造燕邸 文皇辭不見乃乘婦人輿求

見 文皇召入拜 文皇床下時 文皇稱風病不能言久矣信頓首曰殿下無恙卽有恙當急諭臣

文皇曰余誠病且困待死爾信復曰殿下不以情語臣朝廷密勅信執殿下意果無他幸從臣歸命

京師卽有意宜告臣 文皇見信稱臣又意甚誠惻

信遂從請雖兵戰大寧真定鄭村霸還軍攻九門營

西克大同轉戰夾河藁城渡淮破盛庸兵入金川門
陞都督僉事建文四年封隆平侯食祿一千石與券
世伯 文皇時時呼信爲恩張凡召太子北京察藩
王動靜諸密要事皆命信永樂二十年征胡功加少

師洪熙元年與世侯券支兩俸子鏞自立功爲指揮
僉事先卒鏞子淳嗣官正統七年信卒贈鄖國公謚
襄僖淳以指揮僉事嗣侯卒子福嗣侯無子弟祐嗣
侯卒無子弟祿與禡爭嗣下法司理正德三年祿嗣
侯卒子瑋優給十二年嗣侯卒無嗣姪桐嗣侯卒子
炳嗣侯

豐城侯李彬傳

倪謙

茂國剛毅公諱彬字質文姓李氏鳳陽定遠人曾祖
福祖榮昭世篤德誼爲鄉善士父信有材略勇銳絕
人從 太祖皇帝起淮甸平定天下積功至明威將
軍濟州衛指揮僉事洪武己巳以老謝事公代之時
年二十九磊落有大志辛未率所部兵從穎國公征
北虜歷朶顏鴉山追襲虜酋阿剌失里至洮兒河身
先士卒多所擒獲復歷黑嶺寒山磨鑣海子及黑松
林熊皮山追襲虜酋兀刺罕禽獲有加 太宗皇帝
居潛聞其驍雄召見與語奇之遂隆眷注明年遣巡

視宣府沿邊諸城起信爲遼東都司都指揮使癸酉
遣相度宣府城基明年率兵築之并築德勝口城乙
亥又築萬全保安城明年征哨泥河營黑松林至哈
刺還駐兵廣昌己卯靖難兵舉公爲前鋒首率兵攻
克薊州遵化進指揮同知繼攻克雄縣漢州進都指
揮僉事已而戰真定拔永平丁大寧剗垣上取廣昌
明年鏖白溝攻濟南累樹奇勲進都指揮同知其冬
破滄州明年斫敵單橋擊衆藁城追奪順德略地定
州勲績愈懋進五軍都督僉事冬戰楊村中傷上亟
遣醫療治賜藥物俾還北平公不自餒願力疾隨軍

自効

上嘉其忠勇諭之曰卿其暫輟戎事之勞歸

輔世子居守壬午

上渡江正位宸極命護中宮至

京念其勞績居多癸未永樂改元定功行賞封奉天

靖難推誠宣力武臣特進榮祿大夫柱國同知右軍

都督府事豐城侯食祿一千石子孫世世承襲錫以

誥券追封其三代自曾祖至父皆豐城侯曾祖母湛

祖母王母張妻周皆封侯夫人由是倚任益至甲申

夏鎮守江西秋召還明年送趙王赴北京還往捕皂

君山寇丙戌南征交趾 命充左叅將有白金文綺

之賜率師入境水陸夾攻直擣賊巢禽獲魁黨俘獻

於朝悉平其地戊子凱還加祿米五百石尋命勦平
東海倭寇明年總督操江尋往長河禽賊李法良械
京庚寅勦捕福建海寇頻年爲國墾菑除害耘鋤海
內不避險艱未嘗少息 上深嘉獎錫予稠疊一時
將臣無與爲匹壬辰佩征虜前將軍印 命充總兵
官鎮守甘肅有白金文綺寶鏹之賜至鎮振揚威武
邊塵清肅甲午召還扈蹕北征胡虜明年鎮守陝西
丙申召還扈蹕還京尋佩征夷將軍印 命充總兵
官鎮守交趾在鎮七年遠人畏威懷德莫不帖伏境
宇寧謐壬寅年六十二卒於位交人市爲之哭相向

號哭如喪所親計聞 上震悼爲輟一日視朝厚加
賻贈勅有司歸其喪遣官諭祭賜葬宛平縣西安里
之原追封茂國公諡剛毅加封三代祖考皆如公爵
妣皆公夫人子賢嗣封賢卒孫勇嗣太史曰天開一
代之祥必於興王之地篤生豪傑龍騰雲翥出佐景
運共成王業若漢祖開基蕭曹陵勃皆由豐沛以從
光武中興鄧賈吳岑皆自南陽而附策功錫爵爲時
虎臣非無意也我 聖祖提三尺起淮甸一時從龍
而興者大抵皆濠梁之傑也積功累勲率階小隸化
爲公侯尚何異於古乎今觀茂國之父奮跡濠梁旣

以勇略從定天下致位闡帥而公繼之復從義旗清
內難豐功偉烈卓冠當時卒致生拜侯封歿進公爵
大國榮名上及三世非天實生之以爲興王之佐而
何視漢豐沛南陽之豪不足多也公爲人儀狀奇偉
襟度弘遠深沈果敢端靜有謀忠誠以事 上恩信
以服下小心畏慎有功不伐有勞不矜用能深荷主
知信用日篤凡有大事輒以屬公咸克有濟信爲一
代之名將矣公謝世已久子賢孫勇世爵相承一德
惟肖皆典兵柄有聲於時流慶之長於斯可見矣公
之勲伐具載國史然世之人或未之知也故爲著之
以補家乘之缺云

豐城侯李熙墓志銘

王叔果

李公諱熙字仲光號緝菴其先鳳陽府定遠人也祖
彬翊高皇帝啓運累功爲都督僉事永樂中以征
討功進榮祿大夫柱國豐城侯食祿一千石賜鐵券
世襲暨錄平安南功加祿五百石遂家於京師彬生
賢賢生勇勇生璽璽無子庶兄旻襲祖爵旻無子而
遂及於公公則旻之姪也嘉靖甲午奉命統耀武
營操練官軍隨以廷臣會推掌中軍都督府及提督
神機營壬寅欽命充總兵官掛平蠻將軍印鎮守
湖廣乙巳楚世子弒逆株連數百人公惻然慮其寃

諮於直指伊公相與平反釋其無辜幾二百人沅州
麻陽洞苗作亂遠邇繹騷公調兵征勦歷三載底寧
諸凡經絡出自已裁不少假麾下而悉中機宜敵愾
奏功勲庸顯於遐服公處之則以謙焉庚戌奉 召
命回京掌前軍都督府事公廉府中宿弊嚴爲禁革
人不敢干以私辛亥奉 勅提督京城九門官軍壬
子總督京營戎政時軍伍疲耗往者率因循行事公
一以精明振刷而綱紀之諸材官咸凜凜奉法大司
馬良鄉趙公永豐聶公並嘉其賢以爲勲臣可倚重
者而公忽以疾告終乃嘉靖癸丑二月二十七日也

距生弘治甲子十一月一日得年五十

寧陽侯贈濬國公謚武靖陳懋神道碑

李賢

永樂初靖難功臣不下數十人然克享祿位於悠久者鮮矣惟太保寧陽侯陳公歷事五朝出藩入衛凡六十餘年而以令終嗚呼盛哉公諱懋字舜卿鳳陽壽州人高祖萬曾祖福祖壹俱追封涇國公妣皆涇國夫人父亨從太祖高皇帝定天下以功陞都指揮使洪武三十二年從太宗文皇帝靖內難復以功進都督同知卒贈奉天靖難推誠宣力武臣特進榮祿大夫柱國追封涇國公謚襄敏母韓氏涇國夫

人襄敏公三子長恭嗣爲都督同知次忠府軍前衛
指揮使季卽公也器宇宏遠識見超卓尤負膽氣工
騎射年弱冠卽從父領兵爲前行凡埧上廣昌蔚州
大同白溝濟南之戰與父同功又禦敵於單橋藁城
西寨東平州鎮小河戰尤力累陞右都督永樂初論
功行賞進封奉天翊衛宣力武臣特進榮祿大夫柱
國寧陽伯食祿一千石子孫世襲賜誥券賚予甚厚
六年受 詔佩征西將軍印總兵鎮守寧夏賜寶鏹
白粲牛羊以爲戒嚴之費公至鎮號令一新凡胡人
降附者親撫綏之務得其歡心乃以七年選精兵自

將大敗虜於境外由是殘孽遠遁邊塵爲之一清捷
聞加封奉天靖難推誠宣力武臣特進榮祿大夫柱
國寧陽侯食祿一千三百石子孫世襲復賜誥券及
貂蟬冠服錦綺寶鏹八年春 上親征北虜公將左
掖兵十一年冬還鎮十二年春 上復親征公仍將
左軍俘馘甚衆明年還鎮十四年夏有報虜酋馬哈
木死者公未之信曰是欲懈我邊備也卽申飭諸將
固守已而虜將果來見有備而退二十年春 上復
北征公率所部兵以從還京賜玉帶金綺龍衣且聞
公有女賢淑禮聘入宮冊封麗妃尋 命歸寧父母

賚予駢蕃當世無與爲比二十一年 詔公統陝西
寧夏甘肅三鎮兵出勦叛虜公率衆直抵賀蘭山擣
其巢穴盡收其酋長也先王十部落及其牛馬駝羊
數萬凱還 上大悅寵賚有加二十二年復隨上北
征師還以公爲殿至京遂領前軍都督府事 仁宗
皇帝登極以公勛戚有勞加大保復官其長子昭爲
勛衛 宣宗皇帝臨御待公尤厚樂安州之平公領
京營兵衛 上有功還有金帛人口之賜二年復鎮
寧夏三年春奏徙靈州城以便防守四年春得玄白
二兔以進 上賜璽書獎諭兼有玉帶龍衣馬圖之

賚六年還京十年 命佩平羌將軍印移鎮甘肅正
統改元今上皇帝嗣位念公勛戚之舊召還奉朝請
十三年冬福建民鄧茂七作亂僞稱閩王勢甚猖獗

上曰此賊非老將不能平特 命公率師往討之
至浙江有欲分兵先守海口者公曰如此是絕其生
路則爲死寇矣不從明春師次寧建有欲屠沙尤二
縣者公曰如此則益堅賊心矣乃下令諭之俾各復
業能斬賊首者官員與王師同於是降者日衆公曰
賊勢已孤無能爲也乃五路進兵一鼓而收之凱還
賞勞加等命領中軍都督府事尋兼領宗人府事景

泰中加太子太師天順改元 皇帝復位恩遇益隆
固辭宮師許之六年春忽得疾踰秋不能起上言臣
老死不足惜惟陛下以生民爲念任賢用能以圖太
平之治則國家幸甚 上覽之惻然曰看卿所奏足
見忠誠宜加調治以副朕懷久之醫藥弗效遂薨時
天順癸未七月十六日也距生洪武己未二月九日
享年八十有五計開 上震悼輟視朝一日追封濬
國公謚曰武靖遣官諭祭加賻及營葬事東宮及諸
王亦各致祭公偉觀修髯語音洪亮曾懷磊落敬禮
文士雖位極人臣未嘗妄自尊大而南征北伐口不
言功當爲中興名將稱首配嚴氏封寧陽侯夫人早
卒子男六人長卽昭次日曰福寧俱早卒次日晟爲勛
衛次日潤次日曰英次日曰昂

西寧侯宋晟神道碑銘

楊士奇

水樂五年七月某日推誠輔運宣忠效力武臣桂國
後軍都督府左都督西寧侯宋公終於肅州計聞
天子悼歎遣官賜祭勅有司給傳還其喪明年夏至
京師葬聚寶門外其考之塋之次公諱晟洪武中所
賜名其字景暘宋世家鳳陽之定遠元季我 太祖
皇帝龍興歲壬辰公隨父朝用兄國興來歸明年從
克濠州又從戰敗賈魯父兄並以功授萬戶甲午從
張天祐克五河泗州盱眙又並進總管乙未從 上
克和州渡江下采石太平總管邵榮等潛有異謀國

興察知以聞榮等伏誅從克溧陽進攻南臺國興戰沒命公襲兄職丙申從攻陳也先水寨克之遂從克南臺公父陞廣德元帥丁酉隨廣德公克宣州還改廣德公天寧翼元帥以老留建康公從鄧愈克徽州受功賞戊戌召入侍衛己亥襲天寧翼元帥庚子調征饒州及江西諸郡以次平賜襲衣文綺命充統兵官平諸山寨洪武元年克建寧遂留守禦新定官制實授武德將軍建寧衛正千戶四年陞懷遠將軍建寧都指揮使都指揮同知冬召還陞江西都指揮使九年調大同授龍虎將軍十一年調陝西所至治兵撫民不嚴而肅十二年掌涼州衛十三年逐北虜至白城獲其人馬甚衆十五年父病詔公還侍又二年父沒既襄事復填涼州虜時數爲邊患公率兵討之追至亦集乃之地斬其兇渠也速兒監等及其衆無算餘悉生繫送京師又招降虜僞國公吳把都等萬八千人而送其酋長工不答兒等百五十人詣京師簡其壯者傳卒伍餘悉處之善地俾耕牧自便驛召公還京獎諭再四賜賚甚厚復填涼州十九年召還陞驃騎將軍右軍都督府都督僉事賜鈔文綺以其官贈其三代仍填涼州廿三年夏遣中使就

賜文金及鈔至秋復三遣賜鈔文綺授制諭充總兵
官征哈密里破之哈密者去肅州千餘里虜所城也
誅其僞王子別列怯等三十餘人獲虜衆千三百人
及金印一銀印二悉送京師所獲馬牛羊咸給將士
二十五年復充總兵官征罕東西番叛寇誅禽七千
五百餘人獲馬二千五百牛羊十萬遂還京師二十
七年調中軍都督府是歲虜寇遼東命充副總兵率
兵討之遇戰腦溫江獲虜衆千餘馬倍之明年廣西
旃幪諸寨連結爲亂命充右副總兵往征之誅禽七
千餘人賊平還京又明年總羽林八衛兵往平五開
龍里十三洞之寇三十一年率師城萬全諸衛歸二
年出填甘肅 太宗皇帝初臨御公朝京師陞後軍
都督府左都督永樂元年授平羌將軍充總兵官仍
鎮甘肅三年虜日益聚近邊公遣人諭以 朝廷德
意其酋長把都帖木兒倫篤兒灰率部衆五千馬駝
萬六千來歸邊境底寧事聞賜勅獎諭命都督徐膺
緒尚書趙玠持節卽軍中封西寧侯賜推誠輔運宣
忠效力武臣柱國仍後軍都督府左都督食祿一千
一百石加賜田若干頃又二年以疾終享年若干

西寧侯宋誠墓志銘

倪謙

國家以神武戡定區夏允賴羆虎之士佐成鴻業於是錫爵酬勲俾傳罔極然出自閭閻者恃崇高而昧學識備員尸祿者爲多求其席父祖遺勲荷國家重寄輒能懋騰聲績者予於西寧侯宋公蓋僅見也公諱誠世家鳳陽之定遠曾祖諱晟膂力有威重當我太祖高皇帝龍興初隨父兄來歸從下江南定中原東征西伐勲名日盛拜僉右軍都督府事出鎮甘肅太宗文皇帝臨御陞後軍都督府左都督尋授平羌將軍充總兵官遣廷臣卽軍中進封西寧侯世

父諱琥駙馬都尉尚安成公主襲侯爵仍授平羌將
軍總兵甘肅祖諱瑛駙馬都尉尚咸寧公主亦襲侯
爵北虜犯順扈 駕將兵往平之沒於戰陣追封鄆
國公謚忠順父諱傑襲侯爵典宿衛禁兵克篤勤慎
母蕭氏中都留守蕭某女貞靜有淑德公幼聰悟好
讀書性孝友軀幹魁頎雋爽及冠美鬚髯善騎射有
勇略景泰初侍父居京師壬申往視別墅於涼州寇
入境掠牛馬長驅而北矣公時率家僮出獵遇之連
發三矢殪二賊賊駭散驅其所掠而還邊人驚歎曰
真將種也甲戌還京痛祖死節承父命還南京祖塋
具衣冠以葬乙亥春侯疾作馳書召公夏五月公兼
程至京泣拜侯床下侯曰吾忍死待汝今及見吾目
瞑矣越七日而卒公哭踊幾絕殯殮如儀官爲賜祭
營葬公扶柩歸葬祖塋罔不周慎秋九月襄事詣
闕謝恩詔令嗣爵每侍朝 上顧其狀貌甚奇之謂
可屬大事不數月命署右軍都督府事政如素習尋
賜璽書命出鎮甘肅授平羌將軍印充總兵官公至
鎮夙夜惴惴圖紹先烈訓戎兵拊士卒謹邊防明斥
堠革姦弊公賞罰秩然武備修飭封疆完實一日閱
武教場忽中風疾亟昇歸而氣已絕矣時天順丁丑

十月二十一日也享年三十有一計聞 上悼惜爲之輟朝配田氏旗手衛指揮田忠女克營公喪戊寅扶柩至京擇地都城北某庄之原以葬請命於朝上遣有司諭祭營冢壙卜以今年月日葬焉嗚呼公本貂圭世胄宜爲驕侈所溺乃能折節務學養成其材是以甫嗣侯封遽登樞府總戎西陲月未一朞卽收安輯之效使天假以年則外服羌胡內固邊境屹然爲國保障當與古名將埒矣大厦方建梁木中摧不亦可慨歎也夫

安遠侯謚武肅柳溥墓誌銘

錢溥

天順五年三月十三日總兵官安遠侯柳公薨於位上聞之震悼輟視朝一日謚武肅公姓柳諱溥字廣達其先安慶懷寧縣人曾祖諱貴祖諱崇皆贈安遠侯父諱升洪武末以千戶從太宗靖難歷陞都督僉事永樂五年俘獲交趾賊犁季犛父子封安遠伯七年從征迤北進安遠侯宣德初戰沒於交趾贈奉天靖難推誠宣力武臣特進榮祿大夫柱國太子太傅進封融國公謚襄敏母倪氏封融國夫人七年公襲其爵正統三年秋掛征蠻將軍印克總兵官帥湖

廣等都司官軍守廣西是冬征大藤峽殺賊楊容拾
等五月討柳州等處六年復入大藤峽破石門等寨
十年征思恩賊獲常萬王等斬之寇遂平十四年還
進太子太師總神機營兼掌右軍都督府事復命守
廣西天順改元 上念公之久勞聞外召進太傅仍
掌營府事冬十二月虜寇涼州掛平虜將軍印率兵
進討俘獲人馬無算寇卽遁去邊境以寧二年師還
以疾解機務養於家四年十月疾稍愈詔起總神機
軍務公夙夜惕厲立春疾復作 上命醫調治弗起
中外聞之無貴無賤咸咨嗟悼惜至垂涕於路曰失

此良將也嗚呼公何以得此於人哉公器宇恢廓廉
慎慈惠得士卒心其初去廣西也營卒困於剝斂違
背者衆已而亡者歸怨者喜彼夷獠復叛及公而又
帖然故餘二十年驅馳往復間而致隆於內外之望
者以此其言動恂恂然詳雅雍穆絕類儒者每被顧
問奏對稱旨朔望請禱神旗歲時陪祭 郊廟皆兢
業自持而誠敬可嘉遇人常謙退如不能至臨大事
決大議則毅然敢言景泰間事多更置衆方唯唯公
獨不然如議也先稱可汗事獨上疏言也先篡逆凡
民罔不懃天討不加而反從其僞可乎衆尤媿服性

不喜侈靡不蓄媵妾暇日端坐一室列經史圖籍於
左右手不停披遇有益於戎務切於治道者必反覆
展玩志欲得於已而見之於行宜出正論於朝端樹
勲勞於邊徼一時靖難元勲之家求稱良將於世如
公者幾人哉嗚呼融國其有後矣配朱氏封侯夫人
先二十四年卒子男五承慶勲衛應襲承宗承宣承
宏承寬

陽武侯追封鄆國公謚忠武薛祿神道碑銘

楊士奇

宣德五年五月太保陽武侯薛公奉命城隆慶永寧
赤城獨石竣事將歸以疾聞上遣中官以御醫往
視且賜勅諭勞至京猶力疾入見上慰諭再三旣
歸第日賜御藥遣中官臨問無幾竟不起七月廿三
日也訃聞上震悼親爲文祭之追封鄆國公賜謚
忠武詔有司治喪葬喪葬之儀皆優等蓋特恩云
公諱祿姓薛氏世家山東膠州之新興社曾祖考諱
安妣劉祖考諱大妣金考諱遇林妣張公兄弟六人

而公第六自少傑特有大志未冠籍戎伍 上官皆
奇之從北征金山及哈刺哈之地又從征迤都山乃
兒不花等處自是累出西北二邊涉萬里而還 太
宗皇帝舉兵靖內難公首從義旗攻九門克薊州遵
化援密雲攻雄縣追敵漠州咸奮勇先驅以一當百
戰真定公生擒敵左副將軍駙馬都尉李堅超陞燕
山右護衛指揮僉事賜白金文綺從援永平攻下大
寧富峪會州寬河時南兵已圍北平城公還先遇其
哨騎薄戰敗之 車駕繼至從戰鄭村埧敵大敗陞
指揮同知從克廣昌蔚州攻大同率兵前哨獲敵人

馬遂從南征大戰白溝河追奔至濟南陞指揮使從
克滄州大戰東昌公以五十騎前哨遇敵兵數百與
戰敗之獲馬三十餘疋敵悉衆來追公復奮戰大敗
之獲馬二百餘疋敵於威縣及深州伏兵以要旋師
皆擊走之從戰夾河大捷戰滹沱河右軍力屈公率
衆馳赴之出入敵陣數十合戰敵敗走公追至夾河
斬馘無算獲馬五百餘疋明日戰單家橋公馬蹶爲
敵兵所得拔刀斬敵兵復上馬督戰遂敗敵將平安
軍以次攻下順德大名彰德及攻西水寨公生擒敵
都指揮一人斬獲尤多從攻東阿東平汶上皆下之

繼戰淝河大店小河汴隄靈壁率勇先諸軍遂渡淮
江從 車駕入京師 太宗皇帝爲臣民推戴旣正
大位論功行賞陞驃騎將軍後軍都督府都督僉事
以其官秩贈三代永樂六年陞都督同知八年從
車駕北征至玄溟河以功進榮祿大夫右軍都督府
右都督兼左軍都督府事以其官秩加贈三代時四
方選至幼軍數萬悉命隸公操習十二年從 車駕
北征十五年初建北京宮殿命公董營繕十八年成
加奉天靖難推誠宣力武臣特進榮祿大夫柱國封
陽武侯食祿千五百石追封其三代皆侯爵賜誥券

二十一年從 車駕北征還奉命討捕湖州叛寇二
十二年復從 車駕北征是年八月 仁宗皇帝嗣
大位加公太子太保子孫世襲侯爵奉命巡北邊商
虜寇雲州公率兵追至大松嶺斬獲甚衆事聞賜勅
嘉獎遣中官及鴻臚卿卽軍中勞之旣還賜白金鈔
幣加歲祿五百石洪熙元年佩鎮朔大將軍印率師
巡北邊宣德元年庶人高煦反 車駕親征命公爲
前鋒先二日圍其城罪人旣得留公撫綏城中軍民
還賜銀幣甚厚明年秋從 車駕巡邊出會州解后
虜寇塞下與戰敗之生擒其酋斬獲其餘衆遂鎮薊

州永平冬還賜銀幣加厚四年率師護兵餉開平者
再五年春佩鎮朔大將軍印巡邊至奇黃嶺遇虜拒
戰悉斬之盡收其家口孳畜陞太保賜鈔幣居三月
董築城之役蓋從公之言以便戍守公平居無事未
嘗忘危計邊務言之亶亶或謂其瑣屑者終不爲變
蓋其志奉國惟恐不盡爲將勇智兼備當先事籌畫
用心之至以夜繼日故所嚮成功未嘗敗北間一二
臨陣中矢石裹創赴鬪有進無退其率師所過紀律
嚴明秋毫無犯而撫卹士卒人人歸心若董繕作規
置有方力不煩費功率堅久人亦罕及蓋一代之興
必有一代之臣公祗事 三聖涉歷多用志篤鞠躬
盡瘁以效臣職故能建功國家流光簡冊致身貴富
垂慶後昆其非古名將之流而今之不可多見者歟

恭順侯贈涼國公謚忠壯吳瑾神道碑

李賢

天順辛巳逆賊曹欽謀爲不軌潛俟七月二日早朝
入內爲亂恭順侯吳公先於是夜一鼓聞之卽與其
弟廣義伯琮與總兵懷寧伯孫鏗走詣長安門告變
於是禁門不啓賊計遂窮舉火燒禁門公等率兵勦
殺奮不顧身賊雖誅滅公以捐軀矣嗚呼先機告變
公之忠也殺賊喪元公之勇也然則逆賊之敗豈非
公之功乎 皇上聞公之歿哀悼殊深輟視朝一日
追封涼國公謚忠壯凡秘器諭祭賻儀之類悉從厚

典復命有司爲營塚壙以安葬之蓋痛念勛戚之臣
爲社稷而死故報功之典倍徙尋常也旣而琮詣予
泣且告曰先兄不幸歿於鋒鏑茲欲立石墓前以白
於世非先生之文不可辭弗獲按通政司叅議趙君
昂之狀公諱瑾字廷璋其先西涼人祖諱永誠永樂
中累以戰功封恭順伯父諱克忠嗣伯爵洪熙初以
戚里恩進封恭順侯正統甲子以征虜功加太子太
保已巳秋禦寇北邊力戰而死追封邠國公謚壯勇
侯楊氏封邠國夫人淑妃克勤官至左軍都督府左
都督亦同兄歿於陣追封遵化伯謚僖敏公生而英
銳襟度爽閎親賢好善未嘗以門第驕人以故縉紳
士大夫樂與之游相與議論古今講說道義而公頗
能識其旨趣尤閑武藝精騎射方其父叔禦虜之際
公亦在陣中發矢射虜洎父叔矢盡而亡公始就執
其酋長念公忠義之後釋之乃還京遂嗣父爵天順
改元 皇上復位公以勛戚隨侍應對稱旨自是日
備顧問賚予甚厚尋命理左軍都督府事公亦感激
夙夜効勤一旦遭變委身則其允蹈忠義視乃父乃
叔爲無愧矣公生於永樂癸巳十二月一日享年四
十有九

定西侯贈涇國公謚武勇蔣貴神道碑

錢溥

蔣周公之胤以國氏漢末有諱子文者淮南人仕爲秣陵尉逐盜至鍾山下而亡大著靈異隆於祀典子孫散處於淮代有聞人而公其裔也然未有如公之顯者公諱貴字大富揚之江都人父從龍當元之季以義勇附 太祖起淮甸洪武十一年隸燕山中護衛侍親王之國卽 太宗也公生有大志恒念父功屈人下甫官卽代役三十一年舉義克雄縣攻大寧戰鄭村埧取廣昌蔚州白溝河戰勝圍濟南回取滄

州戰夾河藁城克西水寨敗敵將平安軍於肥河戰
靈璧收泗州遂渡江入京師功成論次自千夫長陞
至昌國衛指揮同知後征交趾四征沙漠敗阿魯台
子九龍口洪熙元年復至大松嶺擒殺賊衆陞都指
揮僉事調掌彭城衛事宣德二年四川松潘夷叛以
公充右叅將率軍捕之首募鄉道從東路險絕處攀
緣而進賊驚曰兵從天上來邪一日戰十數合以全
勝聞賜勅有奪橋斬關如古良將之譽明年陞都指
揮同知鎮守密雲諸關番夷復叛仍充叅將討之尋
陞左軍都督僉事充副總兵公謂夷性變詐非長驅

撲滅患未可弭乃大閱士連破黑虎等四十餘寨斬
首千五百級生擒稱是投崖誓死者無算夷遂寧謐
賜勅獎諭陞都督同知充總兵官佩平蠻將軍印鎮
守其地凡事有利害悉奏罷行之就威州千戶所建
州治興儒學使知所教列屯而耕易水桐以後遠近
堡壘相望使知所守廩庾以足人心大安正統改元
召還陞右都督時西戎僞王阿台等寇甘涼邊將屢
失利命公佩平虜將軍印率京營五千騎征勦凡陝
西及甘肅涼州等處官軍悉聽節制兵至鎮番出魚
兒海子哨還時虜酋把禿孛羅率衆犯莊浪公命將

禦之生縛李羅等百人又謀報阿台屯伏河西遂躡
踪倍道至亂山奮勇衝入且追且殺至石城泉斬首
二百餘盡獲其馬駝衣械虜有逃奴來言阿台府在
公議卽往副將李安沮之公拔劔厲聲曰汝任邊寄
肉食且數年坐視其縱橫不制尚掉三寸舌以撓我
師敢復諫者死乃策馬前馳見賊遂整陣而前生擒
男婦數十人送營謀復知其不遠令軍士疾走至兀
魯猝見虜牧馬遂約衝馬羣以鞭擊箭橐聲驚之馬
盡佚虜旣失馬皆輓弓步戰不決卽令衆躍馬揮刀
齊入以旗牌手督之遂大捷內擒一胡譯審自石城
泉敗劔止餘八百精勇者公得其情乃分爲犄角勢
列五百騎爲左右翼縱百騎登高峻疑之旣遇賊夾
擊戰逾九十里阿台亦窘死西土遂寧捷聞遣中官
齎綵段白金宴勞封奉天翊衛推誠宣力武臣特進
榮祿大夫柱國定西伯食祿千二百石給世襲誥券
追封其曾祖三公祖八公父從龍皆定西伯曾祖妣
楊祖妣杜妣程皆伯夫人晉鎮甘涼四年召還以雲
南麓川宣慰思任發累寇邊六年命公充總兵官佩
平蠻將軍印賜蟒袍銀盔甲以行公與總督兵部尚
書王驥至雲南衆謂瘴發不宜進公謂尚書曰賊毒

吾民甚可坐視邪遂遣兵勦之賊勢稍却師集金齒分三路進而公與尚書從中路令上江兵夾攻會南風大作縱火四面矢石俱下如雨公乃擐甲鼓勇而前賊大潰斬首十萬餘級江流盡赤移屯騰衝賊據木籠山爲連環七寨又驅象爲陣合數十萬人於馬鞍山公悉破之勢如拉朽直擣巢穴蕩無遺氛賊父子僅以身遁凱還詔戶部侍郎王質持羊酒迎犒臨清至則上親慰勞遣中官賜金幣羊酒於家擇日御奉天門設教坊樂部勞平夷功陞定西侯三代考妣復封如其爵賊父子旣遁聞被擊於緬甸八年命

公與尚書下緬取賊仍寵賜以行時緬人數報送至而潛以金樓船載賊離五十里而不至尚書謂公曰此給我也過江則絕我歸路且瘴厲將發不乘此而剪之可乎於是誘緬人聽賞公則往焚其舟大戰二晝夜其賊首已先去賊子思機發之在孟牙者亦遁去盡俘其妻孥象馬以還破其賊寨二百餘處焚夷遂平九年還上復親宴勞加祿二百石賜白金百兩綵段十表裏楮幣一萬貫金酒器一副鞍馬一疋以寵異之公之子雄見賊去亟率漢達宦軍三十人追殺不及而賊已阨其後衆寡不敵自刎沉於江時

年二十四其十人亦從之死 上嘉其忠勇贈懷遠
將軍彭城衛指揮使十二年瓦剌遣使來朝諜者知
脫脫不花及也先候使回卽分兵入寇 上命公總
兵禦之公至境嚴耀威武賊引去召還嘉勞甚至十
四年正月二十一日忽感風疾薨於家距其生洪武
庚申十一月二十九日享年七十計闡 上震悼罷
朝遣禮部尚書胡濙等諭祭前後十四壇及賜齋糧
孝布明器等物進封涇國公謚武勇命工部營兆域
於榆河鄉泥井里先塋之次而以其年七月六日葬
焉旣葬越月而瓦剌復寇遂有土木之變使公在豈

遽至是哉其冬以公之孫琬襲爵掌左軍都督府事
成化初佩平羌將軍印充總兵官節制甘涼諸軍旣
而守備南京管中軍都督府事忠毅簡亮克繩祖武
而雅好文學達古今事變爲時所倚重

撫寧侯朱謙傳

朱謙夏邑人父真靖難功授世留守指揮僉事謙嗣官累征迤北功陞萬全都指揮使充右叅將分守宣府功陞都督充鎮朔將軍總兵宣府裕陵北狩過宣府率其子永出謁頓首哭獻犒軍勞虜金帛累出兵截虜有功景泰元年虜入石峯口又入龍門關不能禦禦輒敗都督江福援謙又敗詔詰責謙已而與虜戰斬首中律封撫寧伯卒永嗣伯與世券天順初永陳父宣府謁 上事贈侯因稍進用永永慎重不洩法令嚴整四年虜入宣府永出禦虜退班師六年總

兵三千營八年兼總神機營時定襄伯郭登出鎮甘肅永薦留登與同事復圍營充總兵兼領三千營成化二年充靖虜將軍征荆襄有功進流侯乞謚謙武襄未幾虜酋加思蘭入大同塞充平胡將軍禦虜虜退去與世伯尋充平虜將軍出榆林禦虜有功卽軍中進封侯立號總制陝西三邊與世券七年虜入屯柳樹泖永出奇邀戰有功十二年召還加太子太保十四年建州夷結朶顏入遼東塞明年永出塞破其營加太子太傅進封保國公十六年出延綏禦虜十七年大同禦虜亦思馬因戰海東山有功賜券世公十九年虜大入塞充鎮朔將軍總制宣大二路二十三年孝宗卽位召還加太師掌後府總團管如故九年卒追封宣平王謚武襄子暉言與祖謙謚同改武毅是歲暉請嗣公下廷議上特令暉嗣公一世暉嘗充京營總兵與英國公懋新寧伯祐同事卒子騏請嗣公下廷議嗣侯卒子岳嗣卒無子以從弟岡嗣侯

撫寧侯進保國公朱永傳

王世貞

宣平王朱永者字景昌河南之夏邑人其先日明以
戍卒隸北平至子真而從 文皇帝起義積功至中

都留守司指揮僉事父謙調邊戍與虜接角鬪戰者
三十餘年自守備至叅將副總兵遂爲鎮朔將軍總
兵於宣府其官自都指揮至左都督再以戰功封奉
天翊衛推誠宣力武臣特進榮祿大夫柱國撫寧侯
歲祿千石予鐵券是時定襄伯郭登帥大同而謙歸
宣府功名略相埒然謙勇略文采皆不及登而獲老
牖下以功名終贈撫寧侯謚武襄永偉軀貌舉止顧

盼有威容虜之挾 上皇而過宣府也謙出謁睥睨
下有所獻金帛器物酒炙之類使永進之 上皇數
目屬焉景泰中永得嗣謙爵奉朝請 上皇自南城
復覩永而識之曰是子侯也非宣府食我於門者耶
永謝不敢卽召侍左右有所詢問輒率意以對不爲
浮飾往往稱旨 上雖貴重中貴人吉祥大將亭而
內疑厭之以心腹寄永永亦慎重不洩分領太營禁
兵凡車駕游幸必挾永從所賜蟒繡玉帶廐馬寶刀
王竿 上尊金幣鎧甲弓矢不可勝計 上崩以屬
皇太子曰諸侯伯中獨永習兵可任大事俾率兵

治裕陵方中總神機營兼領三千營兵馬掌右軍都
督府事詔脩景泰時制改神機營曰十二團營益以
諸道操卒永復總之而領三千營如故時定襄伯登
久填甘肅永上疏請召之歸與共事或曰定襄宿將
也然子已久在事能爲之下乎永曰吾知治 天子
軍需材耳吾安知下於是物情漸歸永以爲有古范
變父子風荆湘大盜劉千斤石和尚等作亂永以靖
虜將軍總兩京湖廣江西四川諸路兵討之尚書白
圭監其軍至則永病寒不任戰而石和尚已降尚書
圭破其衆永病已始縱兵搜巢穴斬首鹵薄九百餘

俘千斤等又敗之於古路山捕執千斤子聰等百餘
曹藉其符印贊仗萬計餘寇以不時發分兵勦之獲
級至萬餘遂進封撫寧侯增祿歲百二十石北虜配
如恩蘭寇掠大同永復以平胡將軍大出兵拒之虜
退走進號如父謙而加佐理字并階勲追封及三代
虜阿羅寇延綏永以平虜將軍與左都御史王越擊
之擒斬首虜數多鹵馬牛羊甲械以萬計降 勅卽
軍中予世侯留填三邊它虜復屯柳榆莊諸處出沒
爲患永復與戰敗之克獲多賜金幣良厚永疏欲盡
論諸將士功於是兵部言永等二年之間所獲賊十

一人斬首二百五十七而我軍之戰沒者六百六十
四其勝負雅不相當顧以功遷者一千六百三十人
賞者一萬六千七百人矣而今又欲益遷三千一百
二十人於格太踰濫詔乃弗予尋入侍經筵再錄塞
上功加太子太保官一子錦衣衛百戶歲益祿六十
石時永與王越厚相結而出入中貴人汪直門遼東
巡撫陳鉞報建州虜結三衛入寇爲邊患請討之王
越知虜弱易勝也計必永出討而直監其軍已得叅
帥焉而直新入巡撫鉞賂重謀之永改越命以授鉞
遂大發兵破其營五百餘所焚廬舍二千餘區斬首

捕虜以千計馬牛羊十三永進封號保國公直鉞皆
大有遷賞越以是大恨永與汪直然不敢與直異而
更媚之會虜犯延綏永遂爲平虜大將軍與越直合
兵出塞越偵知虜營在威寧海子乃復與直謀使永
將大兵從中道發而身從汪直將輕騎皆選人各二
馬從它徑掩威寧虜破之盡俘其衆而永道迂遠所
費軍食巨萬馬死者以千計而甚至延綏虜已悉餘
衆遁去一亡所獲於是越以文臣得封伯直蔭錫踰
等而永無功自如始大愧悔事直逾謹而與越合不
敢持異矣尋積前後功賜階特進光祿大夫右柱國

加太子太傅歲益祿三百石予鐵券追封及三代
以大將軍出征虜亦思焉於大同海東山等處破之
擒虜酋數人斬首百二十獲馳馬牛羊數二千甲仗
三之賜世公爵再予誥券復爲鎮朔大將軍總大同
宣府兵北禦虜還加太子太師永前後凡八佩大將
印入統六軍盡護徹侯將最名用法嚴持重有威望
而制敵設奇要不能如王越中貴人直少年慄銳喜
功名旣挾上寵開邊釁然所至多不負敗大要直
恃永恃王越耳而兵部尚書陳鉞旣以建州之役
中直心直亦怙之有闡而優者阿丑嘗於上曲宴

爲中貴武狀者挾雙斧狼蹙而前人問之曰我汪太
監也已左右顧其手曰吾惟仗此兩鉞耳而永時有
所役兵治私第阿丑復裝爲楚歌者曰吾張子房能
一歌而散楚兵六千人曰吾聞之楚兵八千人何以
六千曰其二千在保國公府作役耳 上爲之一笑
永懼而罷役出其兵會直與司禮諸大閹交惡而其
所援東廠太監尚銘背之發其奸私并發與王越交
通狀俱貶竄而是時適各與永小閱見顏色永亦自
有內主弗與敗 上崩弘治初復被命典治茂陵方
中工完進太師改領後軍都督府其督諸營兵如故

自是邊徼稀警急師不復出矣永與其婦弟英國公
張懋俱爲太師懋領經筵監脩國史所典司多文事
而永總六師於勲臣肺腑無二朝有大禮歲時迭爲
班首時人榮之以久疾卒追封宣平王初謚武襄以
同父謙謚辭改武毅子暉當嗣公而當事者難之曰
永功固不當公也而暉頗有與援詔特予襲一輩暉
長身美髯器宇凝重寡言笑以其類父永也而才之
又多從出塞外受方略其拜爵則已垂五十矣凡三
歲而領神機營卒又二年兼領三千營掌右軍都督
府事虜犯延綏平江伯陳銳出禦之坐撓徵抵罪暉

遂爲征虜大將軍與太監苗達右都御史琳討之大將軍印最重不易當而暉繼永而佩盡護諸將人以爲榮兵出塞擣虜會大雪虜前已驚走不相格而是時苗達以倖故要暉上疏以捷聞賜報捷人鈔千貫優詔獎勵班師遣中官貴人齎羊酒迎勞於路上特御奉天門見之且下兵部第封賞給事御史言所得虜首三級故勅三道馬四百二十牛六十羊八十器械二千五百而已而報功乃一萬有餘暉等相率爲誣罔請罪之上難苗達弗聽然自是賞亦薄又二年進領十二團營兵馬其三于營務如故監治 孝

肅太皇太后山陵別建饗廟明年復出拒虜於宣府大同復有斬獲班師中貴人迎勞如初加太保侍經筵武宗卽阼充 皇后納徵正使後先賜蟒衣玉帶繡春刀及他器物甚厚以疾請解營府久之卒年六十四贈太傅子麒不得嗣公仍爲撫寧侯數領軍府以征蠻將軍出填兩廣與總督右都御史姚鏌破平田州僂叛酋岑猛加太子太保增歲祿猛之黨衆叛以不時宣勅歸奉朝請久之復起掌軍府卒子岳嗣亦掌軍府以平蠻將軍填湖廣召還卒

弇州外史曰永爲將能持重其馭軍亦嚴整有法

然未嘗有揭社橫草之績而遭世承平爲國虎臣者
垂四十年位元台爵上公所共事者敗而擿誅不及
歿而贈王子孫徹侯世世勿絕是遵何德哉嗟乎開
國之視靖難其巨小尚不可同年而語以視宣平何
霄壤也士大夫不能覩久遠往往駭新建寧遠而忽
宣平輩良可唾矣

懷寧侯孫鏜傳

孫鏜東勝州人永樂二十年嗣父指揮同知從出塞
征胡功再陞都指揮僉事正統十四年充左叅將捕
處州賊功陞督府僉事戰也先都城先登有功景泰
元年薦都指揮李奇楊洪劾其循私下御史獄武清
侯石亨刑部右侍郎江淵等鏜勇敢得釋已而爲大
同副總兵與郭登不協時分爭乞罷兵柄不許四年
請盡統精兵出塞襲虜勅止鏜以奪門功封懷寧伯
明年與世券五年充陝西總兵與兵部尚書馬昂出
禦虜期七月二日出師先一日夜初指揮馬亮走告

鏜曹欽反謀先殺鏜及昂奪其軍攻皇城鏜披衣起
急草奏呼長安左門閤人曰與爾奏疾造上前告急
變稽遲軍法且斬又走右門亦如之內廷始得集兵
縛吉祥鏜微服至太平侯張瑾家議討賊賊已呼噪
四出劫殺文武大臣 上出密帖隙中令百戶楊能
至瑾家伺鏜云何能報鏜誓殺此賊 上喜手勅鏜
父子爲朕用心滅賊賊攻長安右門不得入走攻左
門又不得入欽兄弟率胡兵出趨東安門發火力攻
上又勅鏜賊犯闕急鏜等努力殺賊俄又勅鏜昂盡
統各營兵殺賊鏜子輔子軌迎賊至東市大戰軌斬

力入陣砍欽兩臂傷賊衆乃退軌攢鎗殺軌鏜急請
神砲與諸營兵夾攻欽傷遁歸家投井中并其黨盡
擒伏誅進封侯食祿千三百石與世券成化改元盡
革奪門鏜亦在革中 上曰鏜有勞於國老且無恙
可食祿奉朝請七年卒贈涑水公謚武敏子輔乞嗣
上曰鏜伯以奪門功封然滅賊功大輔子嗣侯卒
子應爵嗣侯卒子瑛嗣侯卒無子弟瑁嗣卒子秉元
嗣卒子世忠嗣

庸從錄

卷之七

七十一

曼山館



